

**Sagɪ tə, Polə nə púpúní ʋ pa  
Kolosə  
Kərisə lià tə nə  
Kolosə tián sagɪ tə yuu wa  
sugʋ**

*Lìù tə, ʋ nə púpúní sagɪ kv tə*

Kv yɪ \*tɔntɔnʋ Polə nə púpúní kv. Máná tə, ʋ nə púpúní sagɪ kv tə, də ʋ yɪ ʋ wulə bán diè Romə nə.

*Lìà tə nə, Polə nə púpúní*

Polə púpúní sagɪ kv tə, ʋ pa \*Kərisə lià tə nə, ba nə wulə Kolosə nə.

*Sagɪ tə wa sugʋ*

Nəjə kv tə yɪrɪ Polə nə púpúní ba nə: Lìà duən kàrì kunkun kàrì, ba ma gɪgarɪ \*Kərisə lià tə Kolosə nə. Ba pià, sə Kərisə lià tə pií ba twá ba nɪbara-ba yofwamɪnan tə nə. Polə pià ʋ birɪ də, Kərisə tə, ʋ nə wulə mu wa, nə dwə won mama. ʋ mù cɪcɪ nə jə nii, ʋ ga jə diàn lʋ diàn mama yuu wa.

Kərisə lià púlí tə yɪ ndə ʋ yɪra nə, ʋ tətə ga yɪ yɪra təntə yuu. Kərisə lià tə nə kən ba waa Kərisə nə yɪrɪ, ba mù də Kərisə tə, ʋ nə tɪga, ʋ pií ʋ bwin, tə dān vwə duən nə. Ba yàá lə ba níá wa, kv twá də Yɪ yɪrɪ, ba ma birɪ kv yoo təntə. Mə kv twá yoo kv tə nə Kərisə lià tə ma birɪ kv. Kv nətu dān pin ba jì ləzwəndura.

*Polə jònì Kərisə lià tə Kolosə nə*

<sup>1</sup> À mù Polə yì Yü nə kúrí nə, də v tətə fira, sə à ya Zwezi-*\*Kərisə \*tuntunv*. À mù də Timote, v nə yì nə nubiu Kərisə yiri, nə púpóní sagi kv tə. <sup>2</sup> Nə pın kv Kərisə lià púlí tə nə, kv nə wulə Kolosə nə. Á mù nə yì nə nubia á nə yì Kərisə nə tí, á nə keni á waa Zwezi-Kərisə nə wuuu də pùé nədv. Nə nyina Yü nə wá fwa pubwanv á yira, v ga pa aba bican sió.

*Polə ken Yü lèèè Kolosə tián yiri*

*(Efəzə tián 1.15-19; Filipə tián 1.3-6; 1 Tesalonikə tián 1.2-4; 3.5-11)*

<sup>3</sup> Mánjá mama, nə jònì Yü, v nə yì nə *\*Yuu-Tiu Zwezi-*\*Kərisə* nyina, nə pın aba. Nə nə wulə nə jònì Yü nə pın aba, nə yàá kə v lèèè á yiri. <sup>4</sup> Nə nì, nətə tə á nə keni á waa Zwezi-Kərisə nə wuuu, yá á ga tə swə lià tə mama, ba nə yì Kərisə nə tí. <sup>5</sup> Mánjá tə, Zwezi-Kərisə suywánjú tə, kv nə yì cígá sugv tə, nə twi á con, kv pın á jə yala Yü con. Yala təntə yì won tə, Yü nə tant, sə v pa aba v sán nə. <sup>6</sup> Kv suywánjú təntə vèli kv yí luv tə mama wa, kv ga tə pùlì kv sùrí wuuu. Mə nətə nə, kv tɔŋa á də con, kv nə zigi dɔn tə nə, á nə nì Yü pubwanv tə yoo, á ga lwarì, Yü pubwanv tə nə yì cígá cígá nətə. <sup>7</sup> Kv yì Epafərasə nə kàrì kv suywánjú təntə, v biri aba. U yì nə nubiswənə. Nə mù də v mù mə nə tɔŋa Yuu-Tiu Zwezi-Kərisə tɔtɔŋi tə duən nə. U tɔŋa v pın Zwezi-Kərisə nə də pùé nədv, á mù yuu*

yiri. <sup>8</sup> Yá v mù dàń nè swìn, v pa nè yèni nètu, Yü-\*Siñu tē nè pɪn á swē duən.

*(Filipə tián 1.9-11; Zwan 1.1-3, 14, 16)*

<sup>9</sup> Kɔ mù nè pɪn, kɔ nè zɪgɪ dɪn tē, nè nè nì kɔ nètu tē, nè yáá jònì Yü nè pɪn aba máńá mama. Yá nè dàń lòrì Yü, sē v pa á yèni kɔ tē nè yɪ v fira, tē zèni zèni, sē v ga pa á na wɔbɔŋa mama, də yənu mama, kɔ nè yɪ v \*Siñu tē nè pɪn. <sup>10</sup> Kɔ nètu wá pa, á wàní á twá kɔ tē nè \*Yuu-Tiu nè pìà, á ga tɔŋa kɔ tē nè poli v pùé nè. Á dàń wá tɔn tɔtɔnzəŋə yiri mama, á ga wá lwarɪ Yü wuuu, á súrí lá. <sup>11</sup> Nē tē lòrì Yü, sē v twá v dɪàn tē nè bɪrɪ v dɪn tē nè, v pa aba dɪàn. Yá á dàń wá wàní á na pínú wuuu, á dānà ká pìí á kē á kwa. <sup>12</sup> Á kənə nè nyɪna Yü lèèè də pupwən. U pɪn á jì là tē, á də nè wáá tori á nɪ v con, v nè tún, sē v pa là tē nè, ba nè yɪ v mù nè tɪ, bwálí tē nè, kɔ nè wulə poni wa. <sup>13</sup> U mù nè van nèba v lɪ, sē yikunu yìèn dān ká dé dɪàn nè yuu wa. U dàń ken nèba v biú Zwezi-Kərisə, v nè swē, pàrì tē wa. <sup>14</sup> Mē v biú təntə nè kwɛn nè cɔna tē v lɪ nè mù də Yü pwərə wa. Yá v mù ga nè yè nèba v jon, sē nè tɪnɪ nè tiàn.

*Zwezi-Kərisə yɪ won mama Yuu-Tiu  
(Efɛzə tián 2.13-19)*

<sup>15</sup> Zwezi-\*Kərisə yɪ Yü tē, là nè wàrì ba nɪ ba yíá wa, nyinyɪga. U mù nè yɪ Yü biú. U yɪn lá də won mama tē wà fwa. <sup>16</sup> Yá Yü yɪ v twá də v mù, v ma fwa wiən tē mama, tē nè wulə lanworu wa də tɪa yuu wa. Tē wiən təntə nè yɪ wiən tē, là nè na də ba yíá, də tē tē, ba nè ba na də yíá. U

fwa \*malike də tə yun tián, də pèégá tə mama, diàn tə, də wiən tə nə jə diàn, də wiən tə nə dé pàrì. Tə wiən təntə mama yì Yü twá də v biú tə, v ma fwa tə. Yá tə ga yì Yü fwa, v pa Zwezi nə. <sup>17</sup> Zwezi-Kərisə yà wulə, də won mama tə təló. Yá wiən tə mama dǎn yì, v mù nə pɪn, tə wulə tə bwálí nə. <sup>18</sup> Kərisə lià púlí tə yì ndə v mù Kərisə yɪra nə, v tətə dǎn ga yì yɪra təntə yuu. U mù nə yì təntən liù, v nə nan, v mù ga nə dí yáá, v bwìn v zàn tian wa. Kù dǎn bɪrɪ də, v wulə wiən tə mama yuu wa. <sup>19</sup> Kù yì Yü tətə fɪra, sə v biú tə ya kù tə mama míámíán, v mù Yü nə yì. <sup>20</sup> U mù Yü nə kù swə, sə v twá v biú tə nə, v pa v də won mama pìi ba kə duən yuu. U twá də v biú tə jana, tə nə nan v tian tə máŋá wa dagarv tə yuu wa, v ma kə bɪcan sié v mù, də tia yuu wiən tə, də lanworu wiən tə mama pwərə wa.

<sup>21</sup> Á də con dí yáá nə, á yà ŋúná də Yü. Yá á yà yì Yü dɔŋa, á nə bɔŋa yokɔkwɪnan, á ga tɔŋa tə yokɔkwɪnan təntə yɪrɪ. <sup>22</sup> Yá síún nə, Yü dǎn pɪn, á mù də v mù pìi á kə duən yuu, v biú tə nə jigə ləzwənə v ga tɪ tə yɪrɪ. Yü fwa nətɔ, sə v pa á wàní á bà, á zɪgɪ v yáá con, ndə lià tə nə, cɔna mama nə təló á yuu wa, yokɔkwɪnan dǎn ká ya á yɪra Yü yáá con, liù mama nə wàrɪ yolwan v swìn á yuu wa. <sup>23</sup> Á dǎn nə mɛ, sə á kə á waa Zwezi-Kərisə nə wuuu, á dǎnà ká yá. Á zɪga də diàn kù wa. Á dǎnà ká pìi á lwàn pubɔŋa də yala tə, á nə jə də Zwezi-Kərisə sɔywǎŋú təntə, ba nə swìn ba bɪrɪ aba. Yá ba swìn kù ba bɪrɪ tia yuu ləzoni tə mama. Mə kù sɔywǎŋú təntə ka swìn

ka biri nè yí à mù Polè dè tutuŋi.

*Nətu Polè nè tuŋa Kərisə lià púlí tə yiri  
(Efəzə tián 3.1-13; 1 Korəntə tián 2.7-13)*

<sup>24</sup> À mù Polè jə pupwən dè càn tə, à nè dé á mù yiri, máŋá ku tə wa. À wulə à dé càn tə, tə nè ga, sə nè dé Zwezi-\*Kərisə tutuŋi tə yiri, sə ku san v púlí tə nè, ku nè yí ndə v yira nè. <sup>25</sup> À jigə Kərisə lià púlí tə tütùndə, sə à tun tutuŋi tə, Yü nè pɪn nè. Tutuŋi təntə nè yí, sə à swɪn v sugv tə mama à biri aba. <sup>26</sup> Sugv təntə yí cígá tə, ka nè sègè lià tə mama yáá nè, ku máŋá nè ba yigə. Yá síún nè, v dàń biri ku lià tə nè, ba nè yí Kərisə nè ti. <sup>27</sup> U fwa nətu, v yà nè pià v biri lià təntə nè də, yosəgu təntə, v nè pià, sə v fwa yí yoo nəfarv. Yá v ga wá san dwíé tə duən tə mama nè, ba nè tà \*Zwifə-ba. Cígá təntə, ka nè sègè nè yí Zwezi-Kərisə yoo wulə á bɪcɪnɪ wa. Yá á dàń twá də v mù, á jə yala də, á wá na tori Yü dun tə wa. <sup>28</sup> Mə v mù Zwezi-Kərisə yoo nè, nè swɪn nè biri lià tə nè. Nə yáá kwè liù mama, nè ga kàrì wá də wɔbɔŋa tə mama, Yü nè pɪn nəba. Nə pià, sə lià tə mama twá Zwezi-Kərisə nè, ba ya lià tə, Yü yìèn tə bɪga ba yun wa. <sup>29</sup> Ku mù nè pɪn, à dàń ma kəni diàn zənzən à tuŋa. Yá ku yí Zwezi-Kərisə diàn nəfarv tə, v nè pɪn nè, dàń nè pɪn, à jə diàn, à ma tuŋa nətu.

## 2

<sup>1</sup> Ku yí cígá, à pià, sə á lwarì, à nè tun zənzən nətu, à pa á mù Kolosə Kərisə lià tə nè, də ba tə nè, ba nè wulə Lawodise nè, də lià duən zənzən

nə, ba tə nə wà nə nı ba yía wa. <sup>2</sup> À fwa nətu, sə à ma zùrì Kərisə là tə mama bıcanı, sə ba vwa duən nə, ba ga sóní duən. À pìà, sə á na yənu tə mama míámíán. Kú nətu dān wá pa á lwarı Yı cígá tə, ka nə sègè. Cígá təntə, ka nə sègè, nə yı Zwezi-Kərisə yoo tə. <sup>3</sup> Wubıŋa də yənu yı wiən, tə nə zıən zənzən, tə ga yı yosəgu Zwezi-Kərisə bırı nəba. <sup>4</sup> À swın yìèn tə tə á con, sə liù mama dān ká wàní ı twá swıan sùràn nə, ı ma gıgarı aba ı dıgv. <sup>5</sup> À mù nə swə à ŋúná də aba, à pubıŋa tə wulə də aba. À fwa pupwən də, á nə tıŋa yoo mama, ndə kú nə mə, sə kú tın nətu, á ga kəni á waa Zwezi-Kərisə nə wuuu, á ba á kwa kəni.

*Zwezi-Kərisə yı nə wubıŋa cígá cígá  
(Efezə tián 2.1-10; 3.14-19; 1 Tesalonikə tián 4.1-2; 1 Timote 6.20-21; Romə tián 6.3-11)*

<sup>6</sup> Á sèe, sə Zwezi-\*Kərisə ya á \*Yuu-Tiu. Kú mù tə yırı, kú dān mə, sə á ya də wá. <sup>7</sup> Á dān yana də wá, ndə tıú ŋınan nə zva tia dèñ nətu. Á zıga dıàn, á ma kə á waa ı nə wuuu, ndə ba nə kàrì aba nətu. Á kəñə Yı lèèè zənzən mánjá mama. <sup>8</sup> Á cia á tıàn nə, á dānà ká pa liù gıgarı aba, ı dıgv də yía swıan sùràn, tə nə ba dèñ jə. Swıan sùràn təntə yı tə nan ləzoni yofwamınan wa, də lıv wiən, tə nə jə dıàn nə yuu wa, kú tà Zwezi-Kərisə con tə nan. <sup>9</sup> Kú tə mama míámíán Yı nə yı, mə kú mù nə Zwezi-Kərisə də yı. <sup>10</sup> Yá á mù də Zwezi-Kərisə dān nə vwə duən nə tə pın, á də jə wiən tə mama míámíán, tə nə wulə ı con.

U mù nè wulə wiən tə mama yuu wa, tə nè dé pàrì ləzoni yuu wa.

<sup>11</sup> Á də Zwezi-Kərisə nè vwə duən nè tə pɪn, ɔ lɪ á yokɔkwɪnan tə mama, sə tə kúv dān ká ja diàn á yuu wa. U nè kwɛn aba nɛtv tə, yɪ ndə bara \*goŋu nè. Yá kv dān nè tà ndə ləzoni nè gwəŋə nɛtv, kv yɪ Zwezi-Kərisə tɪan tə yɪrɪ. <sup>12</sup> Ba nè ləgə aba níá tə wa, kv bɪrɪ də, ba gùrì aba, ndə Zwezi-Kərisə nè tɪga ba ga gùrì wá. Yá kv tə kúv bɪrɪ də, á pɪí á twá ɔ nè á bwin á nan tɪan wa. Kv pɪà kv swɪn də, á pɪn cígá də, Yɪ nè bwin Zwezi-Kərisə ɔ lɪ tɪan wa, yá ɔ jə diàn, sə ɔ bwin á də. <sup>13</sup> Fuən nè, á mù yá yɪ ndə tɪga nè, á cuna tə yɪrɪ. Kv súrì á nè tà Yɪ lià tə yɪrɪ. Yá sívɪn nè, Yɪ pɪí ɔ bwin á mù də Zwezi-Kərisə, ɔ ga fwa pubwanv nè yɪra. U kwɛn nè cuna tə mama, ɔ lɪ nè mù də wá pwərə wa. <sup>14</sup> Ba paa Zwezi-Kərisə dagarv tə yuu wa. Kv mù nè pɪn, sagɪ tə, kv nè bɪrɪ də, nè yɪ cuna lià, tə cùgù. Yɪ dān bɪrɪ də, sagɪ tɛntə kúv ba dən jə. Kv yɪ ndə ba paa kv də Zwezi-Kərisə dagarv tə yuu wa. Yá sívɪn nè, nè cuna tə mama dān zwèe. <sup>15</sup> Zwezi-Kərisə mù dí diàn wiən tə mama yuu wa, tə yá nè jə diàn ləzoni yuu wa, də wiən tə nè dé pàrì, ɔ ga cùgù tə diàn mama. U ken cavɪra tə nè luv mama yáá con, ndə ba nè ta kùv ba dé, ba vaŋa ywəŋə.

*(Romə tián 14.1-6, 17; Galasi tián 4.9-11; 1 Timote 4.1-8)*

<sup>16</sup> Kv mù tə yɪrɪ, á dānà ká sèe á pa liù cəgə aba, kv tə yɪrɪ, á nè dé, nè à yèó kv tə yɪrɪ, á nè nywɪn. Á dānà ká pa liù lɪ diàn ɔ tún ɔ pa

aba, sə tɛ ya á cànì á dé, nə à yèé, sə tɛ ya á sié dɪan. <sup>17</sup> Yìèn tɛntɛ kúù ba dɛ́n jə. Tɛ yɪ ndə yɪwara nə, kɜ yà nə bɪrɪ cígá tɛ, ka nə bìn. Zwezi-Kərisə tətə nə yɪ cígá tɛntə. <sup>18</sup> Á dənà ká pa lià tútùnì də aba kɜ tɛ, á nə mɛ, sə á fwa tɛ yuu wa. Ba mù lià tɛntə yàá kəni càn ba tiàn nə. Ba pɪn dun \*malɪkɛ nə, ba ga fwa ndə ba cuə ba tiàn tɪa, kɜ ga yɪ kunkun. Ba yàá swìn də, Yɪ bɪrɪ ba yoo kɜ tɛ, kɜ ga yɪ kunkun. Tɛ sùràn tɛntə yɪ fwiə sùràn, tɛ nə yɪ yənu, kɜ nə yɪ tutu. Ba pubɪŋa tɛ yɪ ləzwənə pubɪŋa. <sup>19</sup> Ba mù lià tɛntə də Zwezi-Kərisə kúù wà duən nə vwe. U mù nə yɪ nə Yuu-Tiu, yá nə mù də ɜ mù nə vwə duən nə, ndə yuu də yɪra nə vwə duən nə nɛtu. Zwezi-Kərisə pɪn nə vwa duən nə, nə tɪŋa, ndə nandaran yirə yirə nə vwə duən nə, kɜ nɛdu mama ga jə kɜ tutɪŋɪ. Yá yuu tɛ nə pɪn diàn tɛ mama nə, tɛ ga tɪŋa tutɪŋɪ nɛdu. U mù nə saŋa nəba, ɜ pɪn nə vɛli yáá wuuu Yɪ cwəŋə tɛ wa.

<sup>20</sup> Á yèé də, á twá Zwezi-Kərisə nə, á tɪ. Kɜ mù tɛ yɪrɪ, lɜw wiən, tɛ nə jə diàn, kúù ba diàn jə á yuu wa. Bèèèe dən nə pɪn, á tɛ ma fwa, ndə á yɪ lɜw nə tɪ aba? Bèèèe nə pɪn á sèe culən tɛ, ba nə bɪrɪ aba, ba wú: <sup>21</sup> «Á dənà ká tì kɜ tɛ, á dənà ká dé kɜ tɛ, á dənà ká dwen kɜ tɛ yɪra!» <sup>22</sup> Culən tɛntə yɪ tɛ wulə wiən tɛ, ba nə ma tɪŋa, tɛ ga cùgà yɪrɪ. Tɛ yɪ ləzoni cɪcɪ pubɪŋa, ba ma kàrì aba. <sup>23</sup> Wiən tɛntə yɪ ndə wɜbɪŋa wiən nə, ba tətə nə zilì tɛ ba pubɪŋa wa. Ba tətə dən cwi ba tiàn tɪa, ba ga kəni ba tiàn càn wa. Culən tɛntə yɪ ndə tɛ jə dɛ́n, yá tɛ ga yɪ tutu. Tɛ wàrì tɛ



saŋa, sə lià tē lɪ ba tiàn ba pùé yokókwinan fira tē wa.

### 3

*Zwezi-Kərisə pɪn aba mu nədɔn*  
(*Filipə tián 3.18-21; 1 Zwan 3.1-3; Efezə tián 5.3-8; 4.17-31*)

<sup>1</sup> Yɪ nē pɪn, á mù dē Zwezi-\*Kərisə pií á bwin á nan tian wa dē duən. Kɔ mù tē yɪrɪ, á pɪan Yɪ sán wiən tē fira ja aba. Mē Zwezi-Kərisə jèé lá nē, Yɪ jɪzən\* vən nē. <sup>2</sup> Á pɪan á pubɔŋa tē ya wiən tē yuu wa, tē nē wulə Yɪ \*sán nē, ka dàn ká ya lɔb wiən yuu wa. <sup>3</sup> Á tɪga dē Zwezi-Kərisə. Yá Yɪ dàn twá dē Zwezi-Kərisə, ɔ ma pa aba mu nədɔn tē. Yá mu nədɔn tēntē yɪ kɔ sègè Yɪ con. <sup>4</sup> Zwezi-Kərisə nē yɪ á mu cígá cígá. Dɪn don nē, ɔ wá pií ɔ ba ɔ nan nē yíá yuu dē ɔ dun tē. Kɔ máŋá tē wa, á dē wá twá dē wá á na dun.

<sup>5</sup> Kɔ mù nē pɪn, á dàn mē, sə á lɪ yokókwinan tē á bɪcan wa, tē nē yɪ lɔb wiən, á pa tē nyu lá. Tē mù nē yɪ ka pèñ duən vɛɛ vɛɛ, nē à yèé ka tɔn durən yìèn, nē à yèé ka cwàrì, nē à yèé ka pià pùé fira yokókwinan, nē à yèé ka pa lià duən wiən jē yimən tē pa aba. Á nē pɪn lià duən wiən jē yimən tē pa aba, kɔ bɪrɪ dē, á pɪn dun tē wiən tēntē nē ndē woŋwanan nē, á ga dɔgɔ Yɪ vən nē. <sup>6</sup> Mē yokókwinan tēntē yɪrɪ nē, Yɪ lɪŋa wá zàn lià tē yuu wa, ba nē vɪ, sə ba zilí ɔ nii tē. <sup>7</sup> Fuən tē nē, á dē yà tɔŋa yìèn tēntē.

\* **3:1** 3.1 Ka jèñ piú jɪzən vən nē yɪ dun bwálí.

<sup>8</sup> Síún nə, á də dàń dɔga yìèn təntə mama. Tə mù nə yɪ lɪŋa, də dɔŋɪ, də wɔlɔŋɔ, də tɪjaŋa sùràn, də sɔfaran, tə nə naŋa á nii wa. <sup>9</sup> Á dàná ká kɔnɪ kɔnkɔn á kə duən nii nə. Á yɪ lià tə, á nə nan á yá á yɔa nədwan tə, də kɔ tɔtɔnɛɛ mama. <sup>10</sup> Yá síún nə, á dàń zɔa yɔa nədɔn wa. Yɪ nə pɪn aba yɔa nədɔn təntə. Ʋ mù nə kwen kɔ máŋá mama, sə kɔ ya ndə ɔ tətə mi tə nə, sə kɔ pa, á wàní á lwarɪ, ɔ nə yɪ nətɔ zəni zəni. <sup>11</sup> Kɔ mù tə yɪɪ, pɔɪa kúú təlɛ lià tə, ba nə nɪ Yɪ mi nədɔn tə, pɔwərə wa. \*Zwifə-ba də \*Gərekə-ba dàń jigə nədɔ. Lià tə, ba nə \*goŋɪ bara, də ba tə nə ba bara goŋɪ də jigə nədɔ. Vərə tə, də lià tə, ba yíá nə wà pɔɪɪ, də ywəŋə tə, də lià tə, ba nə tɪ ba tiàn tə mama dàń yɪ nədɔ. Zwezi-Kərisə cɪcɪ dàń nə wulə ba mama yuu wa, ɔ ga tɔŋa ba liù mama bɪcan wa.

<sup>12</sup> Yɪ kúrí aba, ɔ pià, sə á ya Kərisə nə tɪ, ɔ ga swə aba. Kɔ mù tə yɪɪ, á piàn á ja bɪcabwanɔ, sə á ya wɔyɔwɔnɪna, sə á cú á tiàn tiɪ, sə á ya bwàbwà, sə á ja pínú də. <sup>13</sup> Kɔ dèń nə yɪ á pɪna yìèn tə, tə nə tɔŋa á pɔwərə wa. Á liù tə, ɔ nə jə yoo də ɔ don, sə á kwen kɔ, sə kɔ zwèe, ndə Zwezi-Kərisə nə kwen á cɔna tə, ɔ pa tə zwèe nətɔ. <sup>14</sup> Kɔ tə nə dwə tə mama nə yɪ, sə á sóní duən, sə kɔ pa á vwa duən nə, sə á yoo mama ga ya zəni. <sup>15</sup> Bɪcan sié tə Zwezi-Kərisə nə pɪn aba, wá tɪnɪ á pɔbɔŋa mama. Yɪ kúrí aba, sə á ya won nədɔ, sə á ja bɪcan sié təntə. Á dàń kənə Yɪ lèèèé máŋá mama.

<sup>16</sup> Zwezi-Kərisə sɔgɔ tə də kɔ yozəŋə tə mama

wá ya á pubuŋa wa. Á kàrà duən, sə á kwè duən də wubuŋa tə mama, á nə jə. Á kənə Yu lèèèe də á waa mama, ɔ pubwanɔ tə yiri. Á nuŋə gwaran, də nuŋi, tə nə bwɪ Yu nə, də nuŋi tə mama, Yu-\*Siŋu tə nə biri aba. <sup>17</sup> Won tə mama, á nə fwa, ku nə yi á nii sùràn, nə à yèé á tutunən wa, á fwa ku \*Yuu-Tiu Zwezi yiri. Á kənə nə nyina Yu lèèèe, ku twá də nə Yuu-Tiu Zwezi.

*Kərisə lià púlí nə mə, sə ku ya nətv*

*(Efɛzə tián 5.22-33; 6.1-9; 1 Piyerə 3.1-7; 2.18-25; Titə 2.9-10; 1 Timote 6.1-2)*

<sup>18</sup> Á mù kana tə, á liù mama mə, sə ɔ sèe ɔ barɪ nii, ndə ɔ nə sèe \*Yuu-Tiu nii nətv. <sup>19</sup> Á mù bara tə də, á swénə á kana tə, á dànà ká tɔn yanyɔna də ba.

<sup>20</sup> Á mù bìsíná-ba, á zílé á ninə də á nyina nii yoo mama wa. Mə ku mù nə poli nə Yuu-Tiu pùé nə. <sup>21</sup> Á mù bia nyina-ba də, á dànà ká fwa, á pa á bia tə lɪŋa zàn, sə ku gwàrɪ ba jìàn. <sup>22</sup> Á mù ywəŋə tə, á sɪá lià tə, ba nə yè aba tə nii, yoo mama wa, lɔv ku tə wa. Á dànà ká zílí ba nii ba yíá wa cɪcɪ, sə ku dàn ká ya ndə á pìà, sə ba bu á nə. Á tɔŋa ba tutunən tə də á bɪcən mama, á nə zílí Yuu-Tiu tə yiri. <sup>23</sup> Tɔtɔŋɪ tə mama á dàn nə tɔŋa, á tɔŋa ku də á bɪcən mama. Á tɔŋa ndə ku yi á tɔŋa á pɪn Yuu-Tiu nə, ku tà lià nə, á tɔŋa á pɪn. <sup>24</sup> Á yèé də, ku yi Yuu-Tiu nə wá ŋwín aba. Á wá na á tori ɔ cən. Zwezi-\*Kərisə nə yi Yuu-Tiu, yá ku ga yi ɔ mù nə, á tɔŋa á pɪn. <sup>25</sup> Liù tə, ɔ nə tɔŋa lwanɪ, Yuu-Tiu Zwezi-Kərisə wá ŋwín

υ lwantu tē ηwírán υ pa wá. Yá liù mama bá doni n don dē.

## 4

<sup>1</sup> Á mù lià tē, á nē yè ywəŋə tē, á jana ba dē cígá, ndə kv nē me nət. Á lie á tián dē, á dē jē Yuu-Tiu υ nē wulə Yu \*sàñ nē.

*Sagi tē yígúró sùràn*  
(Efezə tián 6.18-20; 5.14-17)

<sup>2</sup> Á nē jùnì Yu, sē á ja pínú wuu, á dànà ká pìí á kə á kwa. Á kənə Yu lèèè dē yawala máŋá mama. <sup>3</sup> Á jùná Yu á pa nēba, sē υ pa nē na cwəŋə, nē ma swìn υ sugv tē, sē nē biri Zwezi-Kərisə cígá tē, ka nē sègè, lià nē. Mə kv mù yiri nē, ba vwa nē dē banzala. <sup>4</sup> Á tē jùná Yu á pa nē, sē à wàní à swìn υ sugv tē à biri nēpon nēpon, ndə kv nē me, sē à swìn nət.

<sup>5</sup> Á pian á ja wubɔŋa lià tē, ba nē wà ba waa ken Zwezi-Kərisə nē, yáá con. Yu nē pin aba máŋá nēzəŋu mama, sē á tì kv á ma tun kv tē nē me, sē á tun. <sup>6</sup> Á pian á nii sùràn ya ywání, tē ga ja fira máŋá mama. Ba nē bwe aba, sē á yəni á nē me, sē á le nət.

*(Efezə tián 6.21-22; Filemon 22-25)*

<sup>7</sup> Á pià, sē à tun Tiswikə, υ nē yi nē nubiswəŋə, á con. U yi liù tē, υ nē tɔŋa Zwezi-Kərisə tutɔŋi tē dē, dē pùé nəd. À dē υ mù me nē tɔŋa \*Yuu-Tiu tutɔŋi tē duən nē. Máŋá tē, υ nē wá bà á con, υ wá biri aba won tē mama, à nē wulə kv wa. <sup>8</sup> Mə kv mù yiri nē, à tun wá á con, sē υ pa á yəni, nē nē yi nət, sē υ ga zùrì á bicanì dē.

<sup>9</sup> Á tun v m̀ d̀ Onezimə, v nə yɪ nə nubiswənə, sə ba kwé duən. Onezimə d̀ yɪ liù t̀, v nə twá Zwezi-Kərisə nə d̀ pùé nəd̀. U yɪ á m̀ wa liù. Ba lià bələ təntə d̀n wá swìn yoo t̀ mama, ku nə wulə yəbə, ba bɪrɪ aba.

<sup>10</sup> Arisətarəkə, à m̀ d̀ wá nə wulə b̀n diè t̀ wa, j̀ǹǹ aba. Marəkə, v nə yɪ Barənabasə nubiu t̀, d̀ j̀ǹǹ aba. À dí yáá à swìn v yoo á con. Máná t̀, v d̀n nə twi á con, sə á ja wá zəni. <sup>11</sup> Zwezi, v yɪrɪ don nə yɪ Zwisətisə t̀, d̀ j̀ǹǹ aba. Mə ba m̀ lià batwa təntə cɪcɪ nə yɪ \*Zwifə-ba, à m̀ d̀ ba m̀ nə tɯŋa Yɪ p̀r̀t̀ tutɯŋɪ t̀. Ba z̀r̀t̀ à bɪcan zənzən. <sup>12</sup> Epaferasə, v d̀ nə yɪ á m̀ wa liù, j̀ǹǹ aba. U yɪ Zwezi-Kərisə t̀t̀ǹǹ t̀, v nə j̀ǹǹ Yɪ zənzən máná mama, v pɪn aba. U l̀r̀t̀ Yɪ, sə v pa á ya lià t̀, Yɪ ỳèn t̀ nə bɪga á yuu wa, á ga zɪga zəni á ma tɯŋa Yɪ fɪra, máná mama. <sup>13</sup> Á tətə wáá à bɪrɪ nət̀ t̀, v nə tɯŋa zənzən, v pɪn á m̀, d̀ Lawodise tián, d̀ Yerapolisə tián nə. <sup>14</sup> Nə nubiswənə dɪmɔtɔrɔ Likə d̀ Demasə d̀ j̀ǹǹ aba.

<sup>15</sup> Á j̀ǹǹá Kərisə lià t̀ mama, ba nə wulə Lawodise nə á pa nə. Á j̀ǹǹá Ninfa d̀ Kərisə lià t̀, ba nə yáá j̀r̀t̀ duən v diè wa, á pa nə. <sup>16</sup> Máná t̀, á nə k̀r̀t̀ sagɪ ku t̀, á zwèe, sə á pa ku va ku pa Lawodise Kərisə lià p̀l̀t̀ t̀ d̀ nə, sə ba d̀ k̀r̀t̀ ku. Ku kwa nə, sə á d̀ k̀d̀ lẁǹ, á jon à sagɪ t̀ don t̀ Lawodise tián con, á k̀r̀t̀. <sup>17</sup> Á swián Arəswipə con, sə v kə v yíá lá, v tun tɔtɔŋɪ t̀, Yuu-Tiu nə pɪn wá, v pa ku zwèe.

<sup>18</sup> Á m̀ Polə tətə nə p̀p̀ǹt̀ b̀wálɪ ku t̀ wa d̀

à jɪun à ma jùnì aba. Á dànà ká swèéé dɔ, ba vwa  
nɔ dɔ banzala. Yɪ nɔ wá fwa pubwanɔ á yɪra.

**Yu soywánó sagı**  
**Nuni, Southern: Yu soywánó sagı New Testament**  
**Le Nouveau Testament en Nun**

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 28 Sep 2022 from source  
files dated 8 Feb 2022

d18530a7-7259-5f23-92b6-70e3abe5f3fa